



14. august 2009

EM 2009/20

Inatsisartut Suleriaasianni § 36 imm. 2 tunngavigalugu Naalackersuisunut apeqquteqaatit makkua apeqquteqaatiginiaipakka:

Naalackersuisunut apeqqut: Tarnikkut nappaateqartuuneq pillugu paasissutissiisoqarnissaa Naalackersuisut qanoq isumaqarfigaat?

(Inatsisartunut ilaasortaq Astrid Fleischer Rex, Demokraatit)

Tunngavilersuut:

Kakkilertaguit avatangiisivit nalussanngilaat nuattutit. Kørestoleruit avatangiisivit nalussanngilaat timikkut innarluuteqartutit. Takoriaannaaneqanngippammi napparsimasutit? Tarnikkummi nappaateqaraanni? Qanoq takuneqarsinnaava? Apeqqutitut taakkununga akissut tassaavoq imaaliillaannaq takuneqarsinnaanngimmat. Tarnikkut nappaateqaraanni imaaliillaannaq takussutissaasinnaasunik peqakkajunneq ajorpoq. Ajoraluartumillu tamatuma nassatarisarpaa tarnikkut nappaateqarneq timikkut nappaateqarnertulli ilumoorunneqartigineq ajormat. Ajornartorsiutiviuvorli annertoq, amerlanertigummi tarnikkut napparsimaneq timikkut napparsimanerminngaanniit ajornerusarmat.

Tamanna tunngavigalugu Demokraatit isumaqarput, pissusissamisussasoq tarnikkut napparsimaneq pillugu paasititsiniaanissamut atugassanik Naalackersuisut aningaasanik immikkoortitsisinnaasuuppata.

Paasititsiniaanissap imassaata isikkussaatalu qanoq ittuunissaanut nunatta aningaasaqarniarnerminik oqittorsiunnginnera aallaavigalugu ilusilersorneqartariaqassaaq. Tamannalu ilaatigut suliarineqarsinnaavoq najugaqarfinni peqatigiiffiit peqatigalugit, soorlu "Sugisaq" tarnimikkut nappaatilinnut ilaqutaannullu peqatigiiffik.

Paasititsiniaanermi minnerpaamik ilinniarfeqarfitsinnut oqalugiariartortoqarnissaa Demokraatit kissaatigaa. Oqalugiartut tassaasinnaapput siornatigut maannakkullu tarnimikkut nappaatillit qanigisaallu.

Taassuma saniatigut tarnikkut nappaateqarneq pillugu paasititsiniaaneq 9. klassimi atuartitsissutitut aaliangersimasutut ilanngunneqartariaqaralarpoq, taamaalillutik nunatsinni inuusuttut tamarmik tarnikkut nappaateqarneq suunersoq eqqumaffigilissagaluarmissuk.

Nunarsuaq tamakkerlugu tarnimikkut nappaatilinnut ulloqartitsisoqarnera ukiut tamaasa oktoberip qulingani malunnartinneqartartoq Demokraatit ilisimavaat. Isumaqarpugulli nunarsuaq tamakkerlugu tarnimikkut nappaatilinnut ulloritinneqartoq kalaallinit malunnartinniarneqartarneraninngaanniit paasititsiniaalluarneq sakkussaasoq pitsaanerusoq.

Taamatut oqaaseqarlunga Naalackersuisunit akissutisinissara qilanaaraara.